

ZOMI INNKUAN USA, Inc.
ZOMI COMMUNITY USA)



THUKHUNPI
(Constitution)

2020 September

Zomi Innkuan USA
THUKHUNPI (CONSTITUTION)

Thubulphuh
Preamble

Thukhun-I: Kipawlna Min
Article-I: Name

Thukhun-II: Ngimna Bulpite
Article-II: Purposes

Thukhun-III: Thumeilette
Article-III: Policy and Principle

Thukhun-IV: Pawlmitte
Article-IV: Members

- A. Pawlhuam Kipawlna Khawkte (Member Organizations/Branches)
- B. Pawlmi Suahna (Membership)
- C. Pawlmitte Vaipuak leh Mawhpauk (Member Duties and Responsibilities)
- D. Pawlmitte Hamphatna leh Thuneihna (Member Benefits and Rights)

Thukhun-V: Kivaipuakzia
Article-V: Organization Structure

- A. Innpi (Congress)
- B. Vaihawm Upa Pawl (Board of Directors)
- C. Thuvaante (Executive Officers)
- D. Tanu Pawl (Committee)

Thukhun-VI: Thukikupnate
Article-VI: Meetings

- A. Kumcin Khawmpi (Annual Conference)
- B. Innpi Thukikupna (General Assembly)
- C. Vaihawm Upa Pawl Thukikupna (Board Meeting)
- D. Tanu Pawl Thukikupna (Committee Meeting)

Thukhun-VII: Kiteelna
Article-VII: Election

Thukhun-VIII: Puahphat Dan
Article-VIII: Amendment Procedure

Thukhun-XI: Puahphatnate
Article-XI: Amendments

Thubulphuh
(Preamble)

1. United States of America gam sung a om, ei Zomi-te in minam khat, sanggam unau laizom khat, innkuan khat ihhi hi.
2. Ei Zomi-te in anungta Pasion it in, muan leh suan in ih nei hi.
3. United States of America gam sung a om, Ei Zomi-te in kipawlkhawm in ih zuih ding in hih Thukhunpi ih khung hi.

Thukhun-I: Kipawlna Min
(Article-I: Name)

1. United States of America gam sung a om Zomi taangpi taangtate' kipawlna min pen "Zomi Innkuan USA" kici ding hi.
(Hih mun a kipan "Zomi Innkuan USA" pen "Kipawlna" kammal zangin kikhum thei ding hi).
2. "Zomi Innkuan USA" kipawlna pen atom in ZIUSA kici ding hi.
3. "Zomi Innkuan USA" kipawlna min pen English in "Zomi Community USA" kici ding hi.

Thukhun-II: Ngimna Bulpite
(Article-II: Purposes)

1. United States of America gam sung a om Zomi-te sung ah kikhualna, kipumkhatna leh kipanpihna akhan semsem theihna ding in Zomi Innkuan USA kipawlna kiphut hi.
2. United States of America gam sung a om Zomi-te' khua leh tui tawh kisai khantohna ding vaite leh Zomi taangpi taangta buppi tawh kisai phattuumna ding vaite pankhop theihna ding in Zomi Innkuan USA kipawlna kiphut hi.
3. Zomi-te in minam kician, minam picing semsem dinmun khat atun' zawhna ding in kipawlkhawm in vaihawmkhop theihna ding in Zomi Innkuan USA kipawlna kiphut hi.

Thukhun-III: Thumeilette
(Article-III: Policy and Principle)

1. Kipawlna in Zomi-te minam khat, sanggam unau laizom khat, innkuan khat hihna bulphuh tawntung ding hi.
2. Kipawlna pen United States of America gam sung amunmun a om Zomi Innkuan kipawlnate' kigawmkhopna bulpi hiding hi.
3. Kipawlna in United States of America' gam, a kumpi leh a Thukhunte zahtak in kemcing ding hi.
4. Kipawlna sung a thukhensatna leh vaihawmna khempueh ah Thukhunpi tawh kituakin atamzaw' thukimna kimang ding a, atawmzawte' deihna kizahtaksak ding hi.

5. Kipawlna in thagum hatna suanglo ding (Non-violence) hi.
6. Kipawlna pen kumpi ki-ukna tawh kisai kipawlna (Political Party) hilo ding hi.
7. Kipawlna pen biakna kipawlna (Religious Organization) hilo ding hi.
8. Kipawlna sung ah biakna leh upna siksian in kideidanna leh thu khenna om theilo ding hi.
9. Kipawlna min tawh biakna leh upna khat peuhpeuh siksian in thu kivaihawm theilo ding hi.
10. Kipawlna min, neih leh lam, taangsumte pawl khatpeuh, mimal khatpeuh' min leh hamphatna dingin kizang theilo ding hi.
11. Kipawlna sung ah beh leh phung, numei naupang, akhang aham, alian aneu, azawng ahau, innteeek pemta kideidanna omlo ding hi.
12. Kipawlna in leitungbup a om Zomi-te tawh lung kituak in kalsuankhop theihna ding hanciam tawntung ding hi.

Thukhun-IV: Pawlmit

(Article-IV: Members)

A. Pawlhuam Kipawlna Khawkte (Member Organizations/Branches)

1. Zomi Innkuan USA kipawlna in United States of America gam sung a om Zomi Innkuan kipawlna khempeuh huam ding hi.
2. Zomi Innkuan kipawlna a om nailohna State, ahik kei leh khua tuamtuan pan Zomi-te in, Kipawlna Ngeina Dante sung a thukhunte zui in, Zomi Innkuan USA kipawlna sung ah a mimal in lut thei ding hi.
3. Kipawlna in ahuan Zomi Innkuan kipawlna khempeuh in, Kipawlna Ngeina Dante (Bylaws) sung a thukhunte zui in Kipawlna Pawlsumpi khia ding hi.

B. Pawlmi Suahna (Membership)

1. Zomi Innkuan USA kipawlna' Thukhunpi asang thei United States of America gam sung om Zomi khempeuh Pawlmi suak thei ding hi.
2. Kipawlna' Thukhunpi, Ngeina Dante (Bylaws) leh Vaihawm Upa Pawl (Board of Directors) in a ciangtan pawllutna sum leh pawlsum a tuamtuan a khia, Zomi Innkuan kipawlna' Pawlmi khempeuh Zomi Innkuan USA Pawlmi cingtaak khat in kiciamteh ding hi.
3. Pawlmi khatpeuh in Pawlmi hihna panin akhawl noleh, Kipawlna Ngeina Dante sung a thukhunte zui in, kikhawlsak thei ding hi.

C. Pawlmit Vaipuk leh Mawhpuk (Member Duties and Responsibilities)

1. Pawlmi khempeuh in, Kipawlna' Ngeina Dante leh Vaihawm Upa Pawl (Board of Directors) in a ciangtan, pawllutna sum, kumsim sum leh pawlsum a tuamtuan maan takin khia ding hi.

2. Pawlmi khempeuh in Kipawlna tawh kisai pulak ding leh thusun ding khatpeuh a om leh Kipawlna' Tangmite (Representatives), ahikhei leh Kipawlna Ngeina Dante sung a thukhunte tungtawn in pulak ding a, Kipawlna' pua lam a pulaknate kithusimlo ding hi.
3. Pawlmi khempeuh in, Kipawlna panpih in gum tawntung ding hi.
4. Pawlmi khempeuh in Kipawlna tung ah diktat (Honest) ding hi.
5. Pawlmi khempeuh in Kipawlna sung a Kivaipuakzia zui in kimakaihna leh vaihawmnate thusim ding hi.

D. Pawlmite Hamphatna leh Thuneihna (Member Benefits and Rights)

1. Pawlmi khempeuh in Kipawlna tung pan a kikim hamphatna ngah ding hi.
2. Pawlmi khempeuh in Kipawlna tawh kisai thute ah thuneihna akikim (Equal Rights) nei ding hi.
3. Pawllut Pawlmite thuneihna pen Tangmite leh Palaite tungtawn in kilang ding hi.
4. Pawlmi khempeuh in, Tangmite (Representatives) tungtawn in, Khawmpi leh Vaihawm Upa Pawl (Board of Directors) tung ah, Kipawlna tawh kisai thu leh late kuppith thei, panpih thei, kantel thei ding a, thu sung thei ding hi.
5. Vaihawm Upa Pawl (Board of Directors) sung a Upate panmunte alen dingin, kipawlna ciat panin, Pawlmi khat peuhpeuh kiteel thei, kiseh thei ding hi.
6. Thuvaante (Executive Officers) sung a panmunte alen dingin Pawlmi khat peuhpeuh kicial thei ding hi.
7. Pawlmi khat peuh in, United States of America gam leitang tung ah sihna atuah leh, Thukhunpi leh Ngeina Dante zui-in Vaihawm Upa Pawl (Board of Directors) thukimna bangin, Kipawlna min tawh kigaal ding hi.
8. Pawlmi khatpeuh in tuahsiatna, dong tuahna, cihmawhna, dahna kahna atuah leh, Vaihawm Upa Pawl (Board of Directors) thukimna bangin Kipawlna min tawh kipanpih, kidahpih thei ding hi.
9. Pawlmi khatpeuh in nopna, min phatna, gualzawhna, tungtuanna angah leh, Vaihawm Upa Pawl (Board of Directors) thukimna bangin Kipawlna min tawh kipah tawi thei ding hi.
10. Thukhunpi, Ngeina Dante leh Vaihawm Upa Pawl (Board of Directors) in aciangtan pawlsum khat peuhpeuh akhialote Pawlmite' hamphatna panin kikhaktan thei ding hi.

Thukhun-V: Kivaipuakzia

(Article-V: Organization Structure)

A. Innpi (Congress)

1. Kipawlna' Pawlmi buppite tang'in thu anei ding in Innpi (Congress) khat om ding hi.
2. Pawllut Kipawlnate leh Pawlmite thuneihna pen Innpi (Congress) tungtawn in kilang ding hi.
3. Innpi (Congress) pen Zomi Innkuan USA kipawlna in ahuam Zomi Innkuan kipawlnate panin akipuak Tangmite (Representatives) leh Palaite (Delegates) tawh kilam (Form) ding hi.

4. Innpi (Congress) in Pawllut Zomi Innkuan kipawlna leh Pawlmi khempeuh in Kipawlna tawh kisai thu leh la khempeuh ah a kikim thuneihna (Equal Rights) a ngahna ding, Kipawlna tawh kisai thu leh la khatpeuh ah biakna leh upna siksian in kideidanna leh thu khenna a om lohna ding, biakna leh upna khat peuhpeuh siksian in thu vaihawmna a om lohna ding, Kipawlna sung ah beh leh phung, numei naupang, akhang aham, alian aneu, azawng ahau, innteeek pemta kideidanna a omlohna ding, Kipawlna min, neih leh lam, taangsumte pawl khatpeuh, mimal khatpeuh' min leh hamphatna dingin a kizatlohna ding in a cing, a kem, a encik Kipawlna Innpi hi dinghi.
5. Innpi (Congress) in Vaihawm Upa Pawl (Board of Directors), Thuvaante (Executive Officers), Kipawlna tangin mapang Tanu leh Tanu Pawl khatpeuh in Kipawlna Thukhunpi, Ngeina Dante leh Genvai Thukhunpi khatpeuh zui-in thuneihna leh mawhpauk a neihna uh tawh kituak in a vaihawmna, mapanna, sepnate ah kileekkimna (Checks and Balances) a omden theihna dingin enciik ding hi.
6. Innpi (Congress) in Vaihawm Upa Pawl (Board of Directors) vaihawmna khat peuhpeuh ah Kipawlna Thukhunpi, Ngeina Dante leh Genvai Thukhun khatpeuh tawh kituaklo a vaihawmna a om leh tua vaihawmna laihsakkik, khawlsakkik theihna thuneihna nei ding a, hih Thukhunpi tawh kituak in Vaihawm Upa Pawl (Board of Directors) phiat/beisak thei ding hi.
7. Innpi (Congress) in Vaihawm Upa Pawl (Board of Directors) leh Thuvaante (Executive Officers) sung a mapang khatpeuh, ahih kei leh Kipawlna taangin mapang khatpeuh kikhawlsakna, kimawhsakna a om hun ah, thu akikohna tungtawn in Kipawlna Thukhunte tawh kituak in vaihawmna, sepna om leh omlo sittelna leh akisam bangin vaihawmkikna thuneihna anei, thu khensatsa khat a ennik Thukhen Pawl (Court of Appeal) sem thei ding hi.
8. Innpi (Congress) makai in Innpi (Congress) leh Vaihawm Upa Pawl (Board of Directors) panmunlen teng in Kumcin Khawmpi sung a Kiteelpi ah Vaihawm Upa Pawl (Board of Directors) teel ding hi.

B. Vaihawm Upa Pawl (Board of Directors)

1. Kipawlna' Pawlmi buppite tang'in thu vaihawmpi ding in Vaihawm Upa Pawl (Board of Directors) khat om ding hi.
2. Kipawlna min tawh thu leh la vai hawmna ding khempeuh, Vaihawm Upa Pawl (Board of Directors) tung ah kinga (vest) ding hi.
3. Vaihawm Upa Pawl (Board of Directors) in, Kipawlna tawh kisai thu leh la khempeuh ah Thukhunpi tawh kituak in thu khensat thei (Make Decision), thu vaihawm (Plan) thei ding hi.
4. Vaihawm Upa Pawl (Board of Directors) in, Thuvaanpi (Executive Director) leh Thuvaante (Executive Officers) tawh kikum in, Kipawlna Ngiimna Bulpite, Thumeilette akisep, ataangtunna ding in vaihawmpi hi ding hi.
5. Vaihawm Upa Pawl (Board of Directors) in, kumsim sumngahna ding leh sumzatna ding tuatkholhna leh sehkhohhna (Annual Budget) etkikna (Review) leh thukimna (Approve) bawl/nei ding hi.

6. Vaihawm Upa Pawl (Board of Directors) in, Kipawlna min tawh mapanna lianpite ahi United Nations tawh kizopna vai, kumpi khatpeuh tawh kizopna vai, adang kipawlna khatpeuh tawh mapankhopna vai, Geivai cihte tawh kisai in thukhensatna (Major Decisions), thuneihna nei ding a, kiciamna lianpite (Major Commitments) leh geelna lianpite (Major Plans) etkikna (Review) leh thukimna (Approve) nei ding hi.
7. Vaihawm Upa Pawl (Board of Directors) in, Kipawlna min tawh sum leh paai zonna (Fundraising), kipawlna mabante geelna (Planning) vaihawmnate ah mapangpi hi ding hi.
8. Vaihawm Upa Pawl (Board of Directors) in, kipawlna mabante (Programs), sum leh paai ngahzah ding ngimnate (Financial Goals) ah mazopna (Progress) om leh om lo sittel (Evaluate) ding a, kipawlna kalsuanna akizopnate akician ahih denna ding in Thuvaante (Executive Officers) tawh asem, abawl dingte, mapang dingte cialna, behlapna leh akilawm, akituak thaman lohikna (Compensation) piakna tawh vaihawmpihna nei ding hi.
9. Vaihawm Upa Pawl (Board of Directors) pen teelcing Upa mimal atam pen (21) leh Thuvaanpi tawh kilam (Form) ding hi.
10. Vaihawm Upa Pawl (Board of Directors) sung ah Upapi (Chairman), Upapi-Huh (Vice Chairman), Thusapi (Secretary) leh Neihsakem (Treasurer) panmunte alen ding in Uplate sung pan in kiteel ding hi.
11. Vaihawm Upa Pawl (Board of Directors) in Kipawlna min tawh a vaihawmna khempeuh asem abawl ding, ma apang ding, a tanu ding in, Thuvaante (Executive Officers) thu pia thei ding hi.
12. Vaihawm Upa Pawl (Board of Directors) in, Kipawlna maban khat peuh ah Kipawlna taangin a madawk tanupi ding in Thuvaanpi (Executive Director) leh Thuvante (Executive Officers) cial (Hire), panpih (Support), sittel (Evaluate), khawlsak (Discharge) theihna nei ding hi.
13. Vaihawm Upa Pawl (Board of Directors) in, Kipawlna Vaihawmna khatpeuh ah kician in vaihawmna ahih theihna ding in thu akancian, a sittel ding, ahih kei leh thukimsa vaihawmnate maban azom ding in Committees (Tanu Pawl-te) phuan thei ding a, phiatik thei ding hi.
14. Pawllut Zomi Innkuan kipawlna leh Pawlmi khempeuh in Kipawlna tawh kisai thu leh la khempeuh ah a kikim thuneihna (Equal Rights) a ngahna ding, Kipawlna tawh kisai thu leh la khatpeuh ah biakna leh upna siksian in kideidanna leh thu khenna a om lohna ding, biakna leh upna khat peuhpeuh siksian in thu vaihawmna a om lohna ding, Kipawlna sung ah beh leh phung, numei naupang, akhang aham, alian aneu, azawng ahau, inntee pemta kideidanna a omlohna ding, Kipawlna min, neih leh lam, taangsumte pawl khatpeuh, mimal khatpeuh' min leh hamphatna ding in a kizatlohna ding in Vaihawm Upa Pawl in mawhpauk la ding hi.

C. Thuvaante (Executive Officers)

1. Kipawlna mabante ah madawk in ma apang ding in Thuvaante (Executive Officers) kicial ding hi.
2. Vaihawm Upa Pawl in Vaihawm Upa panmunlen atam zaw thukimna tawh Kipawlna Ngeina Dante sung a kikhung panmunte zui in Thuvaante cial ding hi.
3. Thukhunpi leh Ngeina Dante sung a Kipawlna Mabante, Khawmpi leh Vaihawm Upa Pawl (Board of Directors) in Kipawlna min tawh a vaihawm Mabante atangtun theihna ding in Thuvaante in sem/ma pang/tanu/madawk ding hi.

4. Thuvaante in Kipawlna min tawh vaihawm ding, zeek ding, sep ding bawl ding khat peuhpeuh a om ciangin Vaihawm Upa Pawl (Board of Directors) tung ah pulak in thu sung thei ding hi.
5. Thuvaanpi in Vaihawm Upa Pawl lamlahna nuai-ah om ding a, Vaihawm Upa Pawl tung ah thu puak ding hi. (Report to Board of Directors).
6. Thuvaanpi in, Vaihawm Upa Pawl tawh kithuah in, Kipawlna Ngiimna Bulpite, Thumeilette akisep, ataangtunna ding in asem abawlpi panmun laden ding hi.

D. Tanu Pawl (Committee)

1. Vaihawm Upa Pawl (Board of Directors) in Kipawlna Mabant ah ma apang dingin Maban nam zui-in Tanu Pawl tuamtumte phut thei, lam thei, sawl thei, cial thei ding a, a hun zui-in phiat thei ding hi.
2. Vaihawm Upa Pawl sungpan panmunlen te in kivakna, kipiakkhiat zawhna leh dinmun tawh kituak in Tanu Pawl sungah makaihna, mapangna nei ding uhhi.
3. Tanu Pawl Makai khatpeuh in a Tanu Pawl sung ah ma a pankhoppih ding in Pawllut Pawlmi, mipil misiam, makai ulian, khuanu khuapa, nungak tangval khatpeuhpeuh cialthei, sehthei ding hi.
4. Tanu Pawlsung thu kikupna, thu vaihawmnate Vaihawm Upa Pawl (Board of Directors) tung ah pulak kik ding a, Upa Vaihawm Pawl in kipsakna nei ding hi.
5. Kipawlna Maban nam khatpeuh ah ma apang dingin a kiphut Tanu Pawl khatpeuh in Vaihawm Upa Pawl (Board of Directors) thupiakna leh lam lahna bang bek in ma pang thei ding-a, amau hoihsak thu bek tawh vai khat peuhpeuh vaihawm tuam thei lo ding hi.
6. Vaihawm Upa Pawl (Board of Directors) in Kipawlna maban azom ding in A Tawntung Tanu Pawl-te (Standing Committees), Hun Ciangtan khatsung Tanu Pawl-te (Special Committees) leh Thudot Pawl (Advisory Board) cih bangin a kisapna zui leh akisap hun in phuan thei ding hi.
7. Vaihawm Upa Pawl in, Kipawlna Vaihawmna khatpeuh ah kician in vaihawmna ahih theihna ding in thu akancian, a sittel ding Tanu Pawl aphuat ciang in siamna, theihna tuamtum, numei pasal akileek kimna cih bangin etna tuamtum (Point of Views) tawh akilam hi ding hi.
8. Vaihawm Upa Pawl in, Kipawlna Vaihawmna khatpeuh ah thukimsa vaihawmnate maban azom ding in Tanu Pawl a phuan ciang in tua vaihawm, thukimnasa asangthei, azomnuam dingte bek mapang ding in seh thei ding hi.

Thukhun-VI: Thukikupnate

Article-VI: Meetings

A. Kumcin Khawmpi (Annual Conference)

1. Kum (1) sim-in khat vei, Zomi Innkuan Khawmpi kibawl ding hi.
2. Zomi Innkuan Khawmpi sung ah Zomi a ut khempeuh kah thei ding hi.
3. Khawmpi sung ah Kumcin Thu Kikupna (Annual Meeting), Kumcin Khawmpi kinei ding hi.
4. Innpi (Congress) panmunlen a tam zaw thukimna tawh Thukin Khawmpi kisam thei ding hi.

5. Kumcin Khawmpi in Kipawlna tawh kisai thu leh la khempeuh ah thuneihna a sangpen nei ding hi.
6. Kumcin Khawmpi akah Pawlmi atam zaw thukimna, ahik kei leh Thukhun a omsa zui in thu kikhensat ding hi.

B. Innpi Thukikupna (General Assembly)

1. ZIUSA Kipawlna Innpi (Congress) Thukikupna (General Assembly), kum khat in atawm pen (3) vei kibawl ding hi.
2. Kipawlna maban tawh kisai Vaihawm Upa Pawl ngaihsutna pia ding in Innpi thukikupna (General Assembly) kibawl thei ding hi.
3. Innpi thukikupna (General Assembly) pen Video/Teleconference tawh ahi zongin, Internet kizopna tawh ahi zongin, kibawl thei ding hi.
4. Innpi (Congress) sung a thukikupna khempeuh ah atamzaw thukimna tawh thu kikhensat ding hi.

C. Vaihawm Upa Pawl Thukikupna (Board Meeting)

1. Vaihawm Upa Pawl (Board of Directors) panmunlente Thukikupna, kum khat in atawm pen (6) vei kibawl ding hi.
2. Teleconference/Video-conference tawh ahizong in, Internet pan kizopna tawh ahi zongin, Vaihawm Upa Pawl (Board of Directors) thukikupna kibawl ding hi.
3. Vaihawm Upa Pawl thukikupna (Board Meeting) khempeuh ah Thuvaante (Executive Officers) te akihel Upate (Board Members) khempeuh kah ding hi.
4. Thukikupna (Board Meeting) sung ah Vaihawm Upa Pawl (Board of Directors) panmunlen atam zaw akah leh Thu kikumkhom-cing in kisim ding hi.
5. Thukikupna (Board Meeting) sung ah, thukikupna akah Vaihawm Upa Pawl (Board of Directors) panmunlen atam zaw thukimna tawh thu kikhensat ding hi.

D. Tanu Pawl Thukikupna (Committee Meeting)

1. Kipawlna maban leh a thu a la tawh kizui in, Vaihawm Upa Pawl thupiakna zui-in Tanu Pawl thukikupna (Committee Meeting) kibawl thei ding hi.
2. Tanu Pawl thukikupna (Committee Meeting) pen Video/Teleconference tawh ahi zongin, Internet kizopna tawh ahi zongin, kibawl thei ding hi.
3. Tanu Pawl (Committee) sung a thukikupna khempeuh ah atamzaw thukimna tawh thu kikhensat ding hi.

Thukhun-VII: Kiteelna

(Article-VII: Election)

1. Kipawlna' Kumcin Khawmpi sung ah Vaihawm Upa Pawl (Board of Directors) kiteelna kibawling a, Kiteelpi kici ding hi.
2. Leitungbup buaina (Global Disaster) ahieh keileh, Gambup (National Disaster) buaina ahieh keileh, Gamsung thukin patau dinmun (State of Emergency) khatpeuh a om ciangin, Innpi (Congress) Kiteelpi bawl huai leh bawl huailo thu khensat ding hi.
3. Kiteelna ah asimthaam a Me/Vote piakna (Secret Ballot System) dan kizang ding hi.
4. Kiteelna sung ah Me/Vote tam angah pen Pawlmitte teelcing hiding hi.

Thukhun-VIII: Puahphat Dan

(Article-VIII: Amendment Procedure)

1. Hih Thukhunpi sung a thukhun khempeuh Khawmpi sungbek ah kipuahpha thei ding hi.
2. Khawmpi sung Kumcin Thu Kikupna akah Innpi (Congress) panmunlen seh (3) suah seh (2) a thukimna tawh, Thukhunpi sung a om thukhunte kipuahpha thei, kiphiat thei, kibehlap thei ding hi.
3. Thukhunpi puahphatna khempeuh "Thukhun-IX: Puahphatnate" sung, ahieh kei leh Thukhun/Thukhunte puahphatna (Update) bawl in kikhung ding hi.

Thukhun-XI: Puahphatnate

(Article-XI: Amendments)

1. July 2~3, 2017 ni sung teng a kibawl Kipawlna Kumcin Khawmpi sung ah Khawmpi akah Innpi panmunlen seh (3) suah seh (2) valte thukimna tawh 2006 kum a kikhung Thukhunpi pen kipuahpha hi.
2. July 5~6, 2019 ni sung teng a kibawl Kipawlna Kumcin Khawmpi sung ah Khawmpi akah Innpi panmunlen seh (3) suah seh (2) valte thukimna tawh 2017 kum a kikhung Thukhunpi pen kipuahpha hi.
3. September 5, 2020 ni a kibawl Kipawlna Kumcin Khawmpi sung ah Khawmpi akah Innpi panmunlen seh (3) suah seh (2) valte thukimna tawh 2019 July in a kipuahpha Thukhunpi pen kipuahpha hi.

Hih Thukhunpi Kipsakna

September 5, 2020 ni in Tulsa khuapi a om Zomi Innpi leh WebEx Online Video Conferencing tungtawn in akibawl Kipawlna Kumcin Khawmpi sung ah, Khawmpi akah mipi vekpi tam zaw thukimna tawh hih Thukhunpi kikipsak hi.

(Adopted on September 5, 2020 by the Annual Conference).

Khawmpi thukimna bangin;



(Andrew Pau Lian Nun, Pu)
Board Secretary